

18/03/1999

PM bimbang pelajar mudah terpengaruh

Fazli Abdullah; Sulhan Ngadiran

KUALA LUMPUR, Rabu - Datuk Seri Dr Mahathir Mohamad bimbang dengan pelajar, termasuk penuntut di luar negara yang tidak bersyukur dengan pemberian kerajaan dan mudah dipengaruhi pihak tidak bertanggungjawab supaya membenci pemerintah.

Selain itu, Perdana Menteri juga bimbang dengan pembabitan remaja, khususnya pelajar Melayu dalam kegiatan tidak bermoral.

Presiden Gabungan Pelajar Melayu Semenanjung (GPMS), Datuk Suhaimi Ibrahim, berkata Dr Mahathir menyuarakan kebimbangan itu dalam satu pertemuan di antara pemimpin GPMS dan Dr Mahathir, baru-baru ini.

Menurutnya, apabila wujud kecenderungan di kalangan pelajar untuk membenci kerajaan, mereka akan hilang pertimbangan dan kewibawaan sebagai golongan terpelajar, sekali gus gagal bertindak secara rasional.

Justeru, katanya, Perdana Menteri yang juga Penaung GPMS menyokong program Pendidikan Motivasi Nasional anjuran GPMS, bertujuan melahirkan pelajar yang menghargai kerajaan serta cemerlang akademik dan berketrampilan.

"Dr Mahathir melahirkan kebimbangan terhadap masalah berkenaan dan mahu satu mesej yang jelas disampaikan kepada semua peringkat sebagai usaha menangani masalah itu.

"Oleh itu, GPMS berharap Pendidikan Motivasi Nasional yang bermula Sabtu ini akan menjadi asas kepada usaha berterusan GPMS menangani masalah itu," katanya pada sidang akhbar mengumumkan projek perintis program itu, di sini hari ini.

Projek perintis yang akan diadakan di Pontian, Sabtu ini, dijangka disertai kira-kira 200 pelajar yang bakal menduduki peperiksaan Sijil Pelajaran Malaysia (SPM) dan Sijil Tinggi Persekolahan Malaysia (STPM).

Selain itu, ibu bapa pelajar berkenaan, pemimpin masyarakat setempat turut dijemput mengikuti program berkenaan. Beberapa pakar motivasi akan memberi ceramah. Akhbar Metro Ahad juga bekerjasama dengan GPMS untuk mengadakan Dialog Metro Ahad, pada hari itu.

Program itu adalah sebahagian daripada Agenda Perdana GPMS bagi menangani masalah sosial remaja Melayu serta memastikan kecemerlangan bidang pendidikan. Ia bermatlamat melahirkan pelajar yang mempunyai imej, berdedikasi dan berkeyakinan tinggi terhadap negara, kepemimpinan bangsa dan agama.

Kira-kira 30,000 pelajar dari 165 kawasan Parlimen seluruh negara dijangka menyertai program itu sebelum peperiksaan SPM dan STPM bermula, akhir tahun ini.

Mereka mewakili tiga kumpulan iaitu pelajar yang kurang berjaya dalam pelajaran; pelajar cemerlang dalam pelajaran dan aktiviti sekolah bagi memastikan mereka dapat meneruskan kecemerlangan dan pelajar yang menghadapi masalah sosial.

Program itu dilaksanakan berikutan kajian GPMS mendapati remaja Melayu paling ramai terbabit dalam jenayah di ibu kota disebabkan pengaruh rakan sebaya, tekanan hidup dan kemiskinan.

Suhaimi berkata, selepas program itu, GPMS akan membuat tindakan susulan ke atas pelajar berkenaan bagi membentuk satu jaringan yang berkesan di antara GPMS dan kumpulan itu.

Katanya, jaringan yang bakal diwujudkan itu membolehkan GPMS selalu berhubung dengan setiap individu berkenaan, sekali gus mewujudkan sistem pemantauan ke atas golongan itu.

(END)